

御纂醫宗金鑑卷三十九

編輯雜病心法要訣目錄

真中風

類中風

傷風

瘧病

痺證

痿證

腳氣

風塵
...

...

...

...

...

...

直中風

...

...

御纂醫宗金鑑卷之三十九

編輯雜病心法要訣

中風總括

風從外中傷肢體痰火內發病心官體傷不仁與
不用心病神昏不語言當分中絡經府藏更審虛
實寒熱痰脫證撒手爲脾絕開口眼合是心肝遺
尿腎絕鼾聲肺閉證握固緊牙關初以通關先取
嚏痰壅不下吐爲先

註

風謂虛邪賊風從外而中傷人四肢軀體故

名曰中風痰火謂痰火從內而發病人心主
之官故名曰痰火體中風邪輕則頑麻不仁
重則癱瘓不用心病痰火輕則舌強難語重
則痰壅神昏此證或內或外單病輕兼病重
當細辨其中絡中經中府中藏及中經絡兼
中府藏併細審其兼虛兼實兼寒兼熱兼痰
與夫脫證閉證之淺深緩急而治之凡初中
宜先用通關散取嚏有嚏可治無嚏多死口
噤者用開關散擦牙軟之痰涎壅盛用諸吐

法涌之若口噤不開湯藥不能下咽者則將
應服之藥隨引調如麪茶含在不病人口內
用葦管或筆管插入病人鼻孔使氣連藥吹
之其藥自能入咽不可用金器撻之恐傷齒
也

按

中風一證分中血脈中府中藏始自李東垣
中血脈者大秦芩湯中府者小續命湯中藏
者三化湯然從未見有三化湯中藏之證惟
金匱書中分爲四證曰絡曰經曰府曰藏其

說最爲的當可爲後世法蓋口眼喎斜肌膚
不仁邪在絡也左右不遂筋骨不用邪在經
也昏不識人便溺阻隔邪在府也神昏不語
脣緩涎出邪在藏也學者細閱諸家之論自
知不謬云爾

中風死候

寸口脈平卒中死生氣獨絕暴脫之五藏幾息呼
吸泯譬如墮溺豈能期脈來一息七八至不大不
小尚能醫大小浮晝沉夜死脈絕不至死何疑脫

證並見皆死候搖頭上竄氣長噓喘汗如油痰拽
鋸肉脫筋痛髮枯直

註

寸口脈平謂寸關尺脈俱平之人忽然卒中

而死者皆因中邪太甚閉塞九竅天真之氣
不能與人之生氣相通則獨絕於內也譬如
墮跌溺水豈能預期其死耶脈來一息七八
至者不大不小雖困可治若大而無倫小而
如纖浮主晝死沉主夜死不可治也五藏脫

證若三藏四藏並見及搖頭上竄等證皆死

候也

通關散

開關散

熏鼻法

解語法

通關星皂細荷半開關烏梅冰片南巴油紙皂烟

熏鼻龜尿舌下點難言

註

通關散南星皂角細辛薄荷生半夏爲末吹

鼻有嚏可治開關散烏梅肉冰片生南星爲

末擦牙其噤可開巴豆油紙捲皂角末燒烟
熏入鼻內人事自省取龜尿點在舌下言語

白易

三聖散

瓜蒂散

全蠍散

五元散

巴礬丸

無汗吐宜防藜蒂有汗瓜蒂入蠍全重劑藜豆礬

皂膽痰壅吐以巴礬丸

註

痰涎壅盛無汗表實用三聖散卽防風藜蘆

瓜蒂吐之有汗裏實用瓜蒂散卽瓜蒂赤小

豆或用全蠍散卽瓜蒂散加全蠍吐之此皆

吐之輕劑也甚則用五元散乃藜蘆赤小豆

白礬皂角膽礬巴礬丸卽巴豆枯白礬吐之

烏藥順氣散

烏藥順氣實中絡噎斜頑麻風注疼麻黃枳桔烏

蠶共白芷乾薑陳草芎

註

實中絡謂風邪中絡之人形氣實者也喎斜
口眼歪斜也頑麻肌膚麻木也風注疼風氣
攻注骨節疼也是方麻黃枳殼桔梗烏藥殭

蠶白芷陳皮乾薑甘草川芎也

大秦芎湯

大秦芎湯虛中絡喎斜偏廢減參珍秦芎生地石
膏共羌獨防芷細辛芩

註

虛中絡謂風邪中絡之人形氣虛者也偏廢
謂半身不遂也減參珍謂八珍湯減去人參

加入秦艽生地石膏羌活獨活白芷防風細
辛黃芩也偏廢是中經之證而亦可治之者
以此方能養血榮筋爲久病風人調理之劑
換骨丹

中經氣實宜換骨喎斜癱瘓芷芎防冰麝硃香槐
苦味仙人麻首蔓蒼桑

註中經氣實謂風邪中經之人形氣實也癱左

不用也瘓右不用也換骨丹白芷川芎防風
冰片麝香硃砂木香槐角苦參五味子威靈

仙人參麻黃膏何首烏蔓荊子蒼朮桑皮也
麻黃膏者以麻黃熬成膏和煎藥爲丸硃砂
滾衣也

小續命湯

小續命湯虛經絡八風五痺總能全麻杏桂芍通
營衛參草歸芍氣血宣風淫防風濕淫已黃芩熱
淫附子寒春夏石膏知母入秋冬桂附倍加添

註

虛經絡謂風邪中經中絡之人形氣虛也八

風謂八方之邪風中人爲病也五痺詳見痺

門要訣中

黃耆五物湯

黃耆五物虛經絡偏廢虛風無力癱心清語蹇因
舌軟舌強神濁是火痰補衛黃耆起不用益營芍
桂棗薑煎左加當歸下牛膝筋爪骨虎附經添

註

黃耆五物湯治因虛召風中人經絡而病半

身不遂者然審其人若舌強難言神氣不清
則是痰火爲病不宜此方若心清語蹇舌軟
無力難言者乃是營衛不足之病宜用此方

經曰衛虛則不用營虛則不仁此方君黃耆而補衛以起不用臣桂枝白芍而益營以治不仁佐生薑大棗以和營衛也不仁不用在右者屬氣宜倍加黃耆在左者屬血則加當歸在下兩腿兩膝軟者則加牛膝骨軟不能久立者則加虎骨筋軟難於屈伸者則加木瓜周身或左或右經絡不宣通者則加炮附子有寒者亦加之此方屢試屢効者其功力專於補外所以不用人參補內甘草補中也

三化湯

搜風順氣丸

三化氣實風中府昏冒閉滿小承羌形氣俱虛及風燥搜風順氣自然康

註

氣實風中府謂風邪中府之人形氣實也昏冒謂神昏不知人也閉滿謂二便阻隔腹滿脹也小承羌謂小承氣湯厚朴枳實大黃加羌活卽三化湯也若其人形氣俱虛則當以搜風順氣丸緩緩治之自然康也久病風之

人大便多結燥謂之風燥或用續命湯汗過
三化湯下過津液枯乾以致結燥凡病不論
中經絡藏府但有二便阻隔形氣不足難堪
攻下者均宜此法以搜六府之風通腸胃中
之氣二便自利矣

牛黃清心丸

牛黃清心實中藏痰壅神昏不語言口眼喎斜形
氣盛兩手握固緊牙關

註

牛黃清心丸治風邪中藏之人形氣俱實其